

Been Im Ju Pa Koe Ka Daux
Phuk Lai Sigang Khri



Baux (5)

Khrawm Kaing Lai

Simin	Kaing Lai	Plah Lai
1.	Grawng Keh Yohan	1
2.	Grawng Keh Cao Taoh Yesux	9
3.	Grawng Cao Kaing Pa Mi Pui Awn Ju Tix Kaux	19
4.	Siliex Pa Ang Koe Krax Chaox Rhawm	29
5.	Yesux Hu Ka Caong Tix Piang Rawm	43

Title: The living story from the Bible

Translated to the Wa language by:

Yex Ka Lin

Ai Sang Awng

Sam Lao Pao

I Rong Khun

Ai Kap Sin

Sai Rong Khun

Edition: First Draft

Date: 29. 7. 2016

Kheu lai rieng pa plak plih pakpeung gumlox Siyiex in kieh aik o
paox grawm mai ceu cao pa koe ka piang haktiex khawm uik
mawh buanson, riang rao ka daux
Yesux Khrit liak.


Translated from the English *Open Bible* Stories. Original work available at
unfoldingWord.org/stories

This work is licensed under the Creative Commons Attribution-
NonCommercial-ShareAlike 4.0 International License. To view a copy of this
license, visit <http://creativecommons.org/licenses/by-nc-sa/4.0/> or send a
letter to Creative Commons, PO Box 1866, Mountain View, CA 94042, USA.

Grawng Keh Yohan




Lai Lukax 1



Khaix hoik sikah cao jhai bawg ghoik ka pui ceu Yudax, ka bawg yam pa rheung 400 num, kawncau raoma tix kaux hoek sikah ka cao jhai pa kaux Zakharix heue. Zakharix mai moeng nawh Elizabiet ang chix koe kawn heue.



Kawncau raoma krai Zakharix mhong grawng sang koe kawn simex nawh tix kaux mai nhie nawh kok ceu kaux kawn nyawm an mawh Yohan heue. Nawh tag mawh cao jhai ting tix kaux, sivoe ka sang hoek Misiyax heue. Bawg yam an Zakharix tom pawk lox ah nin, “Aux mai moeng aux ang lai chix koe kawn heue. Yiex ra kaux hoik riex ju. Aux tag sang tawng grawng ceu in lih koe yuh ka mawx?”



Kawncau raoma tom deeh ah nin, “Siyiex ploi aux son sang krai lox in ka maix heue. Mawh kheu ang maix yum rhawm ka aux maix tag ang chix sikah tom hoek singaix keh kawn simex maix heue.” Dom mawh dom an Zakharix ang lai chix sikah heue. Khaix an kawncau raoma lih hu khaing nawh heue. Yam Zakharix deeh ing ka nyiex tix, moeng nawh hoik koe kaux heue.



Yam hoik koe kaux Elizabiet liah khix, Kawncau raoma pa hoik hoek ka Zakharix hoek ka Marix pa mawh doeh ceu cat Elizabiet heue. Bawg yam an Marix kawn mawh bun krih, pa hoik doh (chawk) Yosiep ti deuh heue. Kawncau raoma an krai nawh tag sang koe kaux mai keh kawn simex tix kaux heue.



Kawncau roma ah nin ka Marix, “Maix tag kok ceu kaux kawn simiex an mawh Yesux heue. Nawh mawh Misiyax heue.” Yam an Marix pawk lox ah nin, “Grawng in chix mawh yuh ka mawx? Kheu aux mawh bun krih ang sax pied simex heue.” Yam an kawncau roma deeh krai ka nawh ah nin, “Maix tag sang koe kaux kheu Khuan Singax mai Nawh tag mawh Kawn Siyiex pa ting lhaong heue.”



Ang rheung, Marix hoek vhi ka nyiex doeh ceu cat tix pa mawh Elizabiet heue. Yam Elizabiet mhong lox si ngeuh taix khaing Marix, kawn ngie pa ot daux vaig nawh jaloh tix kah heue. Kiex ra kaux gaux rhawm grawng pa daox deng pa yuh Siyiex heue. Marix ot nyiex Elizabiet loe khix mai deeh ing ka nyiex cao tix heue.



Khaix hoik keh Elizabiet kawn simex, kix kok ceu kaux nawh mawh Yohan awm pa kieh kawncaw raoma kix kok heue. Siyiex tom deeh kieh Zakharix chix sikah bawg yam an heue. Zakharix yaogyaw ka Siyiex yuh nin, “Siyiex hoik doh keud ka pui ceu Nawh ku jheeng heue. Kix sang kok kawn simex aux mawh cao jhai cie Siyiex pa ting lhaong heue. Nawh mawh cao pa sang cox khre daux krax son sang hoek Misiyax heue.”

K. Deeh Thawk Theng Ka Been

1. kawncau raoma hoek tix ah pa tix ka Zakharix?
2. Mawh kheu ang Zakharix yum rhawm ka lox ah kawncau raoma nawh yaox kham pa yuh ka mawx?
3. Marix mawh pui pa yuh ka mawx?
4. kawncau rao ma hoek krai grawng pa tix ka Marix?
5. Khaix hoik yaox Marix ka kawncau raoma, nawh hu nyiex pui mawx mai lih tix mawh pa tix?
6. Khaix hoik keh Elizabiet kawn simex, daux nyiex nawh lih tix mawh pa yuh ka mawx?
7. Zakharix krai grawng kawn simex tix pa mawh Yohan mawh pui pa yuh ka mawx?

Kh. Krax Pa Doh Rhawm Ka Been

1. kawncau raoma mawh pa yuh ka mawx?
2. Yam kawncau raoma hoek ti krai grawng sang koe kaux ka Marix, daux rhawm nawh sang koe yuh ka mawx?
3. “Kix sang kok kawn simex aux mawh cao jhai cie Siyiex pa ting lhaong heue. Nawh mawh cao pa sang cox khre daux krax son sang hoek Misiyax heue.” lox in koe dee bleeh yuh ka mawx?

G. Krax Pa Deeh Shiao Daux Ju Tix Khaing Been

1. Jao Zakharix ang yum rhawm ka lox kawncau raoma, Siyiex kieh nawh ang lai chix sikah. Phan ex ang yum rhawm ka lox Siyiex, ex sang yaox ceu pa tix ka daux krax im ju ex?
2. Viang mawh ceu pa nu son nawh kawx, Marix rieb alo Siyiex. Maix sang rieb alo Siyiex ka daux krax im ju maix yuh ka mawx ?

Ng. Ceu Pa Rieb Gau Ex Khaing Been In

1. Phan ex ang yum rhawm ka lox pa krai Siyiex ka ex, ex chix yaox krax pa sivix.
2. Viang mawh ceu pa nu son ex kawx, ex caw ti pon rieb ka lox Siyiex ka daux pa awn rhawm awn rhi awm Marix heue.

P. Baux Lai Pa Caw Tix Ci

Lukax 1:76 Kawn nyawm eue, tag sang kok maix mawh cao jhai cie kaw pa ting lhaong khaing khawm uik. Mawh kheu maix tag sang hu sivoe pak ngai Siyiex son sang cox krax heue.


Grawng Keh Cao Taoh Yesux



Lai Mathiex 1, Lai Lukax 2



Yam mhong Yosiep ka grawng koe kaux Marix, mawh kheu ang rhawm yuh min plak ngai Marix laux, nawh keud ti sang mox tix to khaing Marix heue. Viang mawh nan kawncau raoma tix kaux hoek ka daux ca maox nawh heue.



kawncau raoma ah nin ka Yosiep, “Yosiep, paw vi lhat ti teei ka Marix. Kaux pa koe nawh mawh kheu Khuan Singax heue. Nawh sang keh ka kawncau simex tix mai tag kok ceu kaux Nawh mawh Yesux heue. Mawh kheu Nawh mawh Cao pa sang taoh pui ceu Nawh khaing phimap heue.”



Mawh kheu nan Yosiep tom teei Marix mawh moeng tix heue. Viang mawh nan nawh ang dex mai Marix tom ka ang nyang keh kawm heue.



Yam hoek bawg yam dex sang keh Marix, simiang Romax tawx lox ka pui meung khankix mai mhaing kix dee ing ka nyiex yaong ot tix son sang teei carang ceu kaux pui heue. Mawh kheu nan Yosiep mai Marix kawx yaog tix khaing veng Nazariet deeh ing ka veng Bieliehiem heue.



Yam bleeh kiex veng Bielihem, kheu sidaing haoh hun pui ang lai koe dah dee paung heue. Kiex tom yaox ti paung daux kawg moi plak khaix nyiex heue. Kawn ngie iak kawx keh dee an mai kheu ang koe dee it tom yaox ti kieh Nawh it daux dawng sawm moi heue. Kix kok ceu kaux kawn ngie an mawh Yesux heue.



Ka daux sawm an, cao liang yung tix cub liang yung tix piang gawng baoh an heue. kawncau raoma lih hoek mai jhan rieng dom mawh dom an, cao liang yung khankix die lhak kah heue. kawncau raoma ah nin ka cao liang yung khankix, “Paw vi lhat graung, aux viex lox ceu pa mhawm, pa gaux rhawm hoek son pex. Misiyax hoik keh daux veng Bielihem daux sawm in heue.



Hu krub ka kawn ngie iak an. Pex tag yaox kawn ngie pa pua daux leem daux man mai een ka daux dawng sawm moi heue.” Bawg yam an kawncau raoma khankix lih hoek dom mawh dom an mai yaogyaw Siyiex ah nin, “Kieh yaog min plak ngai Siyiex ka dee kied lhaong khaing paox tix mai ka piang haktiex kieh pa nhim koe ka kawn pui awm pa khaw pa caw rhawm Nawh heue.”



Yam bleeh cao liang yung dah dee ot kawn ngie iak pa mawh Yesux, kix yaox kawn ngie it daux dawng sawm moi awm pa krai kawncau raoma heue. Cao liang yung khankix daox deng mai Marix kawx gaux rhawm kah heue. Khaix an cao liang yung khankix deeh ing dah dee ot tix mai yaogyaw ka Siyiex kheu pa hoik yaox hoik mhong kix heue.



Yam an pui ting pingnya cuyi khankix, pa ot plak lih singaix yaox ka sim-uing pa toh rieng tix mu heue. Kix tawng deeh bleeh sim-uing an plak jhi kix yaox grawng pa keh simiang pa khraox tix kaux heue. Mawh kheu nan son sang pon krub ka Simiang an, kix tom hoek khaing dee singai heue. Kix bleeh daux veng Bieliehiem mai yaox dah dee keh Yesux heue.



Ang rheung, pui ting pingnya cuyi khankix pa kaoh khaing plak lih singaix an tom yaox sim-uing ting tix mu mai hawt khaix sim-uing an heue. Yam kix yaox kawn ngie iak Yesux, kix tom grux ngawng krub ka Nawh mai tawx khawng phak pa ting ngawh jum pa viex kix heue. Khaix an kix tom deeh ing ka dah dee ot tix heue.

K. Deeh Thawk Theng Ka Been

1. kawncau raoma hoek daux ca maox mai krai pa tix ka Yosiep?
2. Khaix an Yosiep yuh pa tix?
3. Yosiep mai Marix hu ka veng Bieliehiem kheu pa tix?
4. Yam hoek kiex veng Bieliehiem, kiex yaox sipub ceu pa yuh ka mawx?
5. Yam keh kawn ngie pa mawh Yesux, kawncau raoma ah pa tix ka cao liang yung khankix?
6. Khaix an cao liang yung khankix yuh, yuh ka mawx?
7. Pui ting pingnya khankix hoek yuh ka mawx ka dee keh kawn ngie Yesux?
8. Yam yaox kix ka kawn ngie Yesux, kix yuh pa tix?

Kh. Krax Pa Doh Rhawm Ka Been

1. Maix yaox yuh ka mawx ka grawh grawng pa keh Yesux ka daux kawg moi ?
2. Kheu pa tix kawncau raoma ah, “Ka piang haktiex kieh pa nhim koe ka kawn pui pa khaw pa caw rhawm Nawh heue.”?
3. Mawh kheu pa tix pui ting pingnya khankix tawx khawng phak pa ting ngawh jum ka kawn ngie Yesux?

G. Krax Pa Deeh Shiao Daux Ju Tix Khaing Been

1. Yam sang keh Yesux, kheu sidaing haoh hun pui ang lai koe dah dee paung heue. Son ang Yesux pon hoek ka daux ju maix, mawh ceu pa tix pa tiebtie?
2. Awm pui ting pingnya khankix tawx khawng phak pa ting ngawh jum. Maix koe rhawm ti sang tawx ceu pa tix ka Yesux?

Ng. Ceu Pa Rieb Gau Ex Khaing Been In


1. Yesux lih hoek piang haktiex ka daux pa tiem rhawm son sang pon pui krax taoh khawm uik.
2. Yesux mawh Siyiex pa pon tawx krax pa nhim ka haktiex.
3. Ex caw tix tawx ceu pa ting ngawh ting jum pa koe daux ju ex ka Yesux. Kheu mawh Nawh Siyiex pa ting lhaong heue.

P. Baux Lai Pa Caw Tix Ci


Mathiex 1:21

*Nawh tag keh Kawn Simex mai maix tag kok ceu kaux
Nawh mawh Yesux, mawh kheu Nawh tag sang taoh pui ceu
Nawh khaing phimap kix heue.*


Grawng Cao Kaing Pa Mi Pui Awn Ju Tix Kaux




Mathiex 19:16–30, Makux 10:17–31, Lukax 18:18–30




Tix singaix cao kaing pa mi pui awn ju tix kaux hoek ka Yesux mai chawk ah nin, “Sara cao gau pa mhawm eue, son sang pon aux ju leeing ju leeing phan caw ti yuh ka mawx?” Yesux ah nin, “Yuh ka mawh maix lai kok Aux mawh sara pa mhawm? Lheu khaing Siyiex tix kaux khaing ang koe pa mhawm heue. Son sang pon ju leeing ju leeing phan caw ti hawt ka lox tawm pingnyap heue.”




Pui awn ju an baux chawk ah nin, “Aux sang caw ti hawt pingnyap pa yuh ka mawx?” Yesux ah nin, “Paw teei ju pui yum. Paw phit vao mai moeng pui. Paw briex. Paw kham mhai sakse pa ang mawh ang meh. Yung yi ka miex keeing tix. Moh paox plawg paox nyawm tix awm moh ka tokaux tix.”




Pui pa awn ju simie Yesux tawng ka mawh tix pui rah see mai nawh ah nin, “Aux hoik yuh ceu in kix tom yam iak tix. Aux kawn taik ceu pa tix?”




Yesux jhak ka nawh mai ah nin, “Pa cud maix kawn koe tix ceu. Hu coh kraung pa koe maix ku ceu mai tawx ka pui hot pui sibhawm khankix. Phan yuh nan maix tag koe kraung khrai ka daux meung raoma. Khaix an hoek ti hawt khaix Aux heue.”




Yam mhong pui awn ju an ka lox Yesux, nawh kied voe rhawm, khi rhawm heue. Mawh kheu mawh nawh pui kied mi tix kaux heue. Kheu ang nawh pon prah ka kraung khrai pa koe tix nawh lih hu khaing Yesux heue.




Khaix an Yesux ah nin ka kawncaw Tix, “Laig kala-uk ka daux kre nyex lheu yie khaing laig cao mi ka daux meung Siyiex heue.”




Yam mhong kawncau khankix ka lox an kix die lhat kah mai kix chawk ah nin, “Mawh pui mawx pa tag sang pon hoek krax taoh?”



Yesux ah nin ka kawncau Tix, “Grawng in kawncau pui ang chix yuh. Ceu pa ang kawncau pui chix yuh, Siyiex chix yuh uik heue.”



Yam an Petrux ah nin, “Ex hoik prah pa koe tix mai hawt khaix maix. Ex tag sang pon ceu pa tix?”



Yesux ah nin, “Kheu Aux, phan prah nyiex ma tix, kraung tix, pux aik tix, nan tix, miex keeing tix, moeng kawn tix, tix ceu ceu tag sang pon sin ngao ju leeing ju leeing phan heue. Pui pa da khaix tom nie tag ot ka, pui pa ot ka tom nie tag da khaix heue.”

K. Deeh Thawk Theng Ka Been

1. Cao kaing pa mi pui awn ju tix kaux hoek ka Yesux mai chawk pa tix?
2. Yesux deeh pawk lox ka nawh yuh ka mawx?
3. Yesux nhie nawh yuh pa tix?
4. Kheu pa tix pui awn ju an voe rhawm khi rhawm mai lih hu ?
5. Yesux ah lox tiag pa tix ka kawncaw Nawh khankix mai krai kix mhong grawng krax taoh yuh ka mawx?
6. Yesux deeh pawk lox chawk Petrux yuh ka mawx?

Kh. Krax Pa Doh Rhawm Ka Been

1. Kheu pa tix Yesux ang cu kaw an kok Nawh mawh Sara Cao Gau pa mhawm?
2. “Ju leeing ju leeing phan” koe dee bleeh yuh ka mawx?
3. “Pa taik” ah Yesux koe dee bleeh yuh ka mawx?
4. Kaw an keud pot ceu pa tix mai hu ka Yesux?
5. “Laig kala-uk ka dauk kre nyex lheu yie khaing laig cao mi ka dauk meung Siyiex heue.” maix keud lox in koe dee bleeh pa tix?
6. “Pui pa da khaix tom nie tag ot ka, pui pa ot ka tom nie tag da khaix heue” sang ah ka pa tix?

G. Krax Pa Deeh Shiao Dauk Ju Tix Khaing Been

1. Son sang koe kraung khrai ka dauk meung raoma, ex caw ti yuh pa tix?
2. Son sang hawt khaix Yesux maix sang pon tik ceu pa tix ka dauk ju maix?


Ng. Ceu Pa Rieb Gau Ex Khaing Been In

1. Ceu pa mhawm khawm uik koe ka daux Siyiex ngie khaing.
2. Yesux nhie ex teem ka pui hot pui sibhawm khankix son sang koe kraung khrai ka daux meung raoma.
3. Yesux nhie ex moh ka Siyiex khaing ku ceu pa koe ka piang haktiex khawm uik.

P. Baux Lai Pa Caw Tix Ci

Makux 10:31 Viang mawh nan, pui pa ot ka tom nie, tag da khaix. Mai pui pa ot khaix tom nie, tag ot ka heue.

Siliex Pa Ang Koe Krax Chaox Rhawm



Mathiex 18:21–35



Tix ngaix, Petrux hoek ka Yesux mai chawk ah nin, “Simiang eue, pux aik lud loe ka aux, aux sang caw ti pluat ploi phimap nawh miex bawg? Tom sidah aliah bawg lie?” Yesux ah nin, “Aux ang krai ka maix tom sidah aliah bawg, viang mawh nan Aux krai tom hoek atiglah aliah(77) bawg heue. Deeh bleeh pa sang ah Yesux caw ti pon pluat ploi phimap paox tix ku jheeng. Khaix an Nawh baox tawx lox phok tiem tix mu heue.




Tix bawg koe simiang tix kaux, yam ciied nawh ti yaox ka carang mau siliex tix khankix, nawh yaox siliex tix koe ceuk tix shien (talantan tix mheen) heue.



Mawh kheu ang siliex an pon tawx ka mau pa ceuk tix, simiang kok ka nawh mai nhie nawh coh moeng kawm tix ceu pa koe tix khawm uik son sang pon tawk ceuk heue.




Siliex an grux ngawng tix sivoie simiang mai ah lox khiox khaw, “chaox rhawm ka aux liak. Aux tag sang deeh tawx ka ceuk aux khawm uik.” Simiang chaox rhawm ka nawh mai pluat ceuk nawh khawm uik heue.



Yam lih hu siliex an khaing tan nawh yaox ka siliex tix, tix kaux pa ceuk mau ka nawh tix yieh. Nawh giex ka siliex an mai kloeg ghok nawh mhaing ceuk ah nin, “Tawx mau ceuk maix ka aux.”



Siliex an grux ngawng tix mai khiox khaw ah nin, “Chaox rhawm ka aux liak. Aux tag sang tawx ceuk maix khawm uik. Viang mawh nan nawh ang nghiet ka siliex an, nawh sau siliex an daux thawng tom hoik sidah tawx nawh ceuk tix heue.”



Yam yaox siliex tang kaux khankix ka grawng an, kix hu krai ka simiang heue.



Yam mhong simiang ka grawng an, simiang kied meet rhawm mai kok siliex pa caox an mai ah nin ka nawh, " siliex pa caox eue, yam khiox khaw maix ka aux, aux hoik pluat ceuk maix. Awm chaox rhawm aux ka maix, maix ang chix chaox rhawm ka tang kaux." Mawh kheu nan simiang giex ka siliex pa caox an mai sau nawh daux thawng tom hoik pon tawx nawh ceuk khawm uik heue.



Khaix hoik krai lox phok tiem Yesux ah nin, “Awm an Keeing Aux piang raoma kawx tag sang yuh nan ka pex, phan pex ku kaux ang pluat phimap pux aik tix khaing daux rhawm pex heue.”

K. Deeh Thawk Theng Ka Been

1. Yesux ah ka Petrux caw ti pluat ploi phimap pui tang kaux miex bawg?
2. Ka daux lox phek tiem pa krai Yesux, simiang tix kaux, yam ciied nawh ti yaox ka carang mau siliex tix khankix, nawh yaox pa tix? Mai nawh yuh ka mawx?
3. Siliex pa koe ceuk tix shien an, ah yuh ka mawx simiang?
4. Yam siliex an yaox ka siliex tix, tix kaux pa ceuk mau ka nawh, nawh yuh pa tix?
5. Yam yaox siliex tang kaux khankix ka grawng an, kix hu krai ka simiang. Simiang an yuh pa tix ka siliex pa ang koe krax chaox rhawm an?
6. Khaix an Yesux tawm lox pa tix ka kawncau khankix?

Kh. Krax Pa Doh Rhawm Ka Been

1. Maix yaox rhawm Siliex pa koe ceuk tix shien an yuh ka mawx?
2. Ka daux been in, “*simiang, siliex pa koe ceuk tix shien, siliex pa koe ceuk tix yieh, mai thawng*” sang ah ka pa tix, koe dee bleeh yuh ka mawx?
3. Krax pluat ploi phimap, koe buanson pa tix?

G. Krax Pa Deeh Shiao Daux Ju Tix Khaing Been

1. Yesux koe rhawm ti kieh kawn pui pon pluat ploi phimap paox tix ku jheeng. Maix sang chix pluat ploi phimap pui yuh ka mawx?
2. Ex caw tix koe krax chaox rhawm ka pui pa yuh ka mawx?
3. Ka daux been in, maix yaox rhawm rhi Siyiex mai rhawm rhi kawn pui yuh ka mawx?

Ng. Ceu Pa Rieb Gau Ex Khaing Been In

1. Awm Siyiex pluat ploi phimap pa yuh ex, ex kawx caw tix pluat ploi phimap pui tang kaux.
2. Phan ex ang pluat ploi phimap pui, phimap pa yuh ex kawx ang chix pon krax pluat ploi heue.
3. Siyiex mawh Siyiex pa kaux sijax. Prawng see awm pa khaw mai phimap pa yuh ex. Viang mawh nan phan ex doh keud phimap mai khiox khaw, Nawh koe krax chaox rhawm ka ex mai pluat ploi phimap ex heue.


P. Baux Lai Pa Caw Tix Ci

Mathiex 18:35 Phan pex ku kaux ang pluat phimap pux aik tix, khaing daux rhawm pex, awm an Keeing Aux piang raoma kawx tag sang yuh nan ka pex heue.

Yesux Hu Ka Caong Tix Piang Rawm



Mathiex 14:22-33 , Makux 6:45-52 , Yohan 6:16-21



Khaix an Yesux kieh cub pui hun khankix ing ka nyiex mawx nyiex an mai kieh kawncau Tix khankix laig daux reu, son sang hu ka yaong pa koe plak toi rawm nhawng tan heue. Khaix an Yesux hu rawg buan ka piang gawng tom bleeh bawg yam pon sawm heue.



Yam an reu brug kawncau khankix ot ka sigreung rawm nhawng heue. Ka daux bawg yam an bhaung ting lih mai pukpak rawm hoek chun ka reu tom dex sang klup reu heue.



Yesux hu ka caong ti piang rawm ka dee ot reu pa brug kawncau khankix heue.



Yam yax kawncau khankix Yesux hoek ka caong tix piang rawm, kix die lhat kah mai keud Nawh mawh miang heue. Yam an Yesux ah nin ka kix, “Paw lhat paw graung, mawh Aux heue.”



Yam an kadaux kawncau Yesux pa mawh Petruux mhaing ti hoek ka Yesux ah nin, “Pui pa hoek ka caong tix yam in phan mawh Maix Cao tete, kieh aux kawx chix hu ka dee ot Maix ka caong tix piang rawm liak.” Yesux deeh ah nin “Hoek heue.”



Mawh kheu nan Petruux lih khaing reu hu piang rawm ka caong tix ka Yesux. Khaix hoik hu Petruux piang rawm, ang rheung, nawh loe ti jhak bhaung ting mai pukpak rawm pa koe sivie siveng tix heue.



Mawh kheu nan Petruh lih ti koe rhawm lhat mai jah ti com ka daux rawm heue. Nawh kok yo ah nin “Simiang eue, taoh aux liak.” Dom mawx dom an Yesux nyeu taix Tix mai giex nawh heue. Khaix an Yesux ah nin “Maix pa iak krax yum rhawm eue, yuh patix, maix ang yum rhawm lie?”



Yam bleeh Yesux mai Petruh daux reu, bhaung ting mai pukpak rawm yawg yiien tix heue. Mawh kheu nan kawncaw khankix kied daox deng kah heue. Mai kix pa ot daux reu krub Nawh Cao ah nin “Maix mawh Kawn Siyiex tete heue.”

K. Deeh Thawk Theng Ka Been

1. Khaix ing pui hun ka nyiex mawx nyiex an, Yesux yuh pa tix?
2. Yam hoek reu brug kawncau khankix sigreung rawm, kix sipub ceu pa tix ?
3. Yam yaox kawncau khankix Yesux hoek ka caong tix piang rawm, kix keud yuh ka mawx?
4. Petrux mhaing ti yuh pa tix? Yesux deeh pawk lox yuh ka mawx?
5. Yam Petrux loe ti jhak bhaung ting mai pukpak rawm pa koe sivie siveng tix, nawh yaox krax pa yuh ka mawx?
6. Yam kok yo Petrux ka Yesux, Yesux yuh pa tix mai ah pa tix ka nawh?
7. Khaix hoik bleeh Yesux mai Petrux daux reu, baox lih ti mawh ceu pa tix?

Kh. Krax Pa Doh Rhawm Ka Been

1. Kheu pa tix Yesux hu rawg buan piang gawng nong nong?
2. Phan maix viex ka daux kawncau 12 kaux, maix sang keud pa tix yam maix yaox Yesux hu ka caong tix piang rhawm?
- 3 Kheu pa tix Yesux ah ka Petrux, “Maix pa iak krax yum rhawm eue, yuh pa tix maix ang yum rhawm lie?”

G. Krax Pa Deeh Shiao Daux Ju Tix Khaing Been

1. Yesux teei bawg yam rawg buan nong nong yam taug mao. Phan maix yaox krax taug mao daux ju tix, maix sang yuh pa tix?
2. Maix yaox Yesux mawh pui pa yuh ka mawx daux been in? Maix sang chix een rhawm tix ka Yesux yuh ka mawh?

Ng. Ceu Pa Rieb Gau Ex Khaing Been In

1. Phan ex yum rhawm ka siawp sibrawm pa pon yuh Siyiex, ex kawx pon yuh kaing pa sang yuh ex tom ting tom lhaong.
2. Phan ex jhak ka krax pa nu pa khawm pa koe sivie siveng, krax yum rhawm ex chix iak hu heue. Ex caw ti een rhawm tix jhak ka Yesux nong nong.
3. Phan ex kok yo ka Yesux ka daux pa yuh ka mawx ang ah, Nawh chix mhong lox pa rawg ex mai chix teem ka ex ku bawg yam.
4. Yesux mawh Kawn Siyiex tete telai heue.

P. Baux Lai Pa Caw Tix Ci

Mathiex – 14:33

Mai kix pa ot ka daux reu, krub Nawh Cao ah nin, “Maix mawh Kawn Siyiex tete heue.”

